



## nostalgieprofeete

**Text: Hans Jürg Zingg**

**Melodie: Hans Jürg Zingg**

**Begleitimprovisation: Edwin Peter**

das isch es lied  
für au di mammeni u pappine  
lehrer lehrmeischer diräcker inschtrukter u andere lappine  
wo zwüsche fufesächzg u vieresibezg  
i dr zyt vo dr höchschtkonjunktur  
em vietnamchrieg  
u dr zuenämende politisierig vo dr jugend  
für iri heiligi outorität hei afa förchte  
u drum wi au wo sech säuber nid wüsse z häufe  
hei afa flueche  
un es böses schicksau beschwöre uf iri missratene junge  
es böses schicksau wo gly  
wo ender als si tänkt hei würtlechkeit isch gsy

heit ers no im ohr wis aube het tönt:

*i gloube dir würdets no lehre  
we s wider chiem wi denn  
denn i dr kriisezyt  
wi hei mir is müesse wehre  
hei chuum gwüsst wien is chehre  
was hei mir müessen entbehre  
denn i dr kriisezyt*

*dir müesstet mängs no lehre  
wes wider chiem wi denn  
denn währed em aktivdiensch  
was hei mir müessen entbehre  
hei chuum gwüsst wien is chehre  
wi hei mir is müesse wehre  
denn währed em aktivdiensch*

*aber dir wos nid heit erfahre  
was wüsst dir scho dervo  
vo üser kriisezyt  
vo üsem aktivdiensch  
verzichte foug u schpare  
das tät o öich nid schlächt  
de tätet er äntlech rächt*

*so het me se ghört trumpeete  
di nostalgieprofeete  
drzue hei si wacker gfeschtet  
u iri ränze gmeschtet  
u tänkt wi schön  
isch doch dä hochkonjunkturföhn  
das bitzeli gringweh verschmärze mer ring  
u für di bösre zyte tüe mir jitz brav uf d syte  
u we dr föhn de zämegheit  
so sy mir feiss u warm aagleit*

*u gly druf pfyfft scho d biise  
vor fufesibezger-kriise  
u d nostalgieprofeete  
ghörsch wider lut trumpeete*

*haha wi guet di krisen üser gseuschaft tuet  
das bitzeli früüre  
tüe mir ja chuun gschpüre  
wiu vo de bessre zyte  
hei mir brav uf dr syte  
u sit dass d biise pfyft im tau  
geits wider so wi dennzumau  
jawohl*

*itz isch doch wider fertigschnätz mit schtreike revoluzze  
itz chöi mer dne lingge vögu äntlech d flügu schtutze  
itz gseht me wider wär cha schaffe u nid nume mule  
itz wärde de di randalinski äntlech usefule  
o d tschingge müesse wider ga u zwar grad schaarewys  
he s gscheht ne rächt hei lang gnue dick verdienet hie bi üüs  
itz wärde äntlech nume no di beschte tröjschte chräft  
dank flyss u qualitätsarbeit e schangsse ha im gschäft*

*itz isch doch wider fertig a dr uni umepflaagget  
es bitzli soziologie gschtudiert u linggi fraase guaagget  
itz gseht er wider wär cha schaffe u nid nume mule  
itz wärde de di randalinski plötzlech usefule  
itz wird me de ou a de schuele äntlech drna schträbe  
das bös abgsunkne leischtigsniwo sukzessive z häbe  
so dass de würklech nur no di begabte flyssige ryffe  
mit einem wort d elitelüt es studium chöi ergryffe*

*itz isch doch wider fertig mit däm ghetz gäge d armee  
itz wird mau öppis ta gäg di soudatekomitee  
itz tüe mau mir bim ritschard willi eifach so lang mule  
bis da di hetzcheibe bim fernseh äntlech usefule  
itz mues d armee um gnüegend kadernachwuchs nümme bange  
geng meh tüe sichri arbeitsplätz bir inschtruktion verlange  
u d äräss wird itz äntlech wider d schuel vo dr nation  
das aues hei mir z danken üser wirtschaftsrezession*

so ghööret er se trumpeete  
di nostalgieprofeete

drwyle tüe mit schtämpfle  
geng meh lüt zyt verplämpfle

geduud dir lütli  
begryffet  
dir bringet es opfer  
em gwautige  
ureidgenössisch-nostalgische

rrrückschritt rrrrrrichtung rrrrrrrrrrrrrrrrrrrrrrütli

(1975)

Erstveröffentlichung: LP *Improvisatiren* (1979)